

Ո Ր Ո Շ ՈՒ Մ

Ճանապարհային ոստիկանության վարչական տույժ նշանակելու մասին 09.02.2023թ. թիվ 2315921975 որոշումը բեկանելու և վարչական իրավախախտման վերաբերյալ գործի վարույթը կարճելու մասին

<< 25 >> 04 2023թ. 7-13- 3772

ք.Երևան

Ճանապարհային ոստիկանության պետ, ոստիկանության գնդապետ Ն.Սարգսյանս, վերանայելով Բագրատ Մկրտչյանի ՄԴ/22259-23 դիմումի քննարկման արդյունքում ստեղծված նյութերը՝

Պ Ա Ր Զ Ե Ց Ի

Քաղաքացի Բագրատ Մկրտչյանը (ծանուցման հասցե՝ քաղաք Երևան, Դավթաշեն վարչական շրջան, Դավթաշեն 2-րդ թաղամաս, 23-րդ շենք, 35-րդ բնակարան) դիմումով խնդրել է բեկանել Ճանապարհային ոստիկանության վարչական տույժ նշանակելու մասին 09.02.2023թ. թիվ 2315921975 որոշումը՝ նշելով, որ նույն իրավախախտման համար վարչական տույժի է ենթարկվել նաև պարեկային ծառայության թիվ 8300409118 որոշմամբ, որը վճարել է:

Դիմումի քննարկման արդյունքում պարզվել է, որ վարչական ակտն ենթակա է բեկանման՝ հետևյալ պատճառաբանությամբ.

<<Վարչարարության հիմունքների և վարչական վարույթի մասին>> ՀՀ օրենքի 37-րդ հոդվածի 1-ին մասի համաձայն՝ վարչական մարմինը պարտավոր է ապահովել փաստական հանգամանքների բազմակողմանի, լրիվ և օբյեկտիվ քննարկումը՝ բացահայտելով գործի բոլոր, այդ թվում՝ վարույթի մասնակիցների օգտին առկա հանգամանքները:

<<Տեսանկարահանող կամ լուսանկարահանող սարքերով հայտնաբերված ճանապարհային երթևեկության կանոնների խախտումների վերաբերյալ գործերով իրականացվող վարչական վարույթի առանձնահատկությունների մասին>> օրենքի 3-րդ հոդվածի 1-ին մասի համաձայն՝ վարչական վարույթի իրավախախտման հատկանիշների պարզման փուլում իրավախախտումը հիմնավորող ապացույցը իրավախախտումն ամրագրած տեսանյութն է կամ լուսանկարը, որը պարունակում է նաև տեխնիկական միջոցով արձանագրված տվյալները: Ըստ նույն հոդվածի 2-րդ մասի՝ որպես իրավախախտումը հիմնավորող ապացույց վարչական կամ դատական կարգով բողոքարկման վարույթում կարող են օգտագործվել Վարչական իրավախախտումների վերաբերյալ Հայաստանի Հանրապետության օրենսգրքի 251-րդ հոդվածով նախատեսված ապացույցները:

Վարչական իրավախախտումների վերաբերյալ ՀՀ օրենսգրքի 251-րդ հոդվածի 1-ին մասի համաձայն՝ վարչական իրավախախտման վերաբերյալ գործի ապացույցներ են համարվում ցանկացած այն փաստական տվյալները, որոնց հիման վրա օրենքով սահմանված կարգով մարմինները (պաշտոնատար անձինք) հաստատում են վարչական իրավախախտման առկայությունը կամ բացակայությունը, տվյալ անձի մեղավորությունը այն կատարելու մեջ և գործի ճիշտ լուծման համար նշանակություն ունեցող այլ հանգամանքներ: Ըստ նույն հոդվածի 2-րդ մասի՝ այդ տվյալները հաստատվում են հետևյալ միջոցներով՝ վարչական իրավախախտման վերաբերյալ արձանագրությամբ, վարչական պատասխանատվության

ենթարկվող անձի բացատրություններով, տուժողի, վկաների ցուցմունքներով, փորձագետի եզրակացությամբ, իրեղեն ապացույցներով, իրեր և փաստաթղթեր վերցնելու վերաբերյալ արձանագրությամբ, ինչպես նաև այլ փաստաթղթերով:

ՀՀ կառավարության <<Ճանապարհային երթևեկության կանոնները և տրանսպորտային միջոցների շահագործումն արգելող անսարքությունների ու պայմանների ցանկը սահմանելու մասին>> 28.06.2007թ. թիվ 955-Ն որոշման 84-րդ կետի 7-րդ ենթակետի համաձայն՝ կանգառն արգելվում է 1.17 գծանշմամբ նշված ընդհանուր օգտագործման տրանսպորտային միջոցների կանգառի կետերից կամ գծանշման բացակայության դեպքում ընդհանուր օգտագործման տրանսպորտային միջոցների կանգառի կամ տաքսիների կայանման տեղերի ցուցիչներից 15 մ մոտ:

Վարչական իրավախախտումների վերաբերյալ ՀՀ օրենսգրքի 124-րդ հոդվածի 25-րդ մասի համաձայն՝ տրանսպորտային միջոցների վարորդների կողմից (բացառությամբ ուղևորների կանոնավոր փոխադրումներ իրականացնող տրանսպորտային միջոցների վարորդների) ընդհանուր օգտագործման տրանսպորտային միջոցների կանգառի կետի տարածքում կանգառ կատարելը կամ կայանելը կամ երթևեկելի մասի եզրին ոչ զուգահեռ կայանելը (բացառությամբ օրենսդրությամբ թույլատրված դեպքերի)՝ առաջացնում են տուգանքի նշանակում՝ սահմանված նվազագույն աշխատավարձի հնգապատիկի չափով:

Նյութերի ուսումնասիրության արդյունքում պարզ է դառնում, որ Երևան քաղաքի Սարյան փողոցի հատվածում 21.01.2023թ. առկա է եղել 5.16՝ <<Ավտոբուսի և (կամ)տրոլեյբուսի կանգառի տեղ>> ճանապարհային նշանը և <<HYUNDAI>> մակնիշի 23LZ023 հաշվառման համարանիշի տրանսպորտային միջոցը ժամը 20:14:43-րդ վայրկյանից 20:16:02-րդ վայրկյանը՝ 79 վայրկյան տևողությամբ կանգառ է կատարել ընդհանուր օգտագործման տրանսպորտային միջոցների կանգառի կետի տարածքում:

Նույն իրավախախտման համար ՀՀ ՆԳՆ ոստիկանության պարեկային ծառայության Երևան քաղաքի գնդի ծառայողների կողմից 21.01.2023թ. ժամը՝ 18:31-ին վարորդ՝ Բագրատ Մկրտչյանի նկատմամբ կազմվել է վարչական իրավախախտման վերաբերյալ արձանագրություն և կայացվել թիվ 8300409118 որոշումը:

ՀՀ ՆԳՆ ոստիկանության պարեկային ծառայության Երևան քաղաքի գնդի 1-ին գումարտակի, 2-րդ վաշտի ավագ պարեկ, ոստիկանության ավագ լեյտենանտ Ռ. Ղարիբյանը՝ Ճանապարհային ոստիկանության վարչական բոլորքների քննության բաժնում գրավոր բացատրությամբ հայտնել է, որ 21.01.2023թ.-ին ժամը 18:31-ին Երևան քաղաքի Սարյան փողոցում նկատել են <<HYUNDAI>> մակնիշի 23LZ023 հաշվառման համարանիշի ավտոմոբիլը, որը կանգառ է կատարել ընդհանուր օգտագործման տրանսպորտային միջոցների կանգառի կետի տարածքում: Վարորդ՝ Բագրատ Մկրտչյանի ներկայությամբ և մասնակցությամբ կազմվել է համապատասխան վարչական իրավախախտման վերաբերյալ արձանագրություն և կայացվել վարչական իրավախախտման վերաբերյալ գործով 8300409118 որոշումը, որից հետո վարորդ՝ Բ. Մկրտչյանին հորդորել է ավտոմոբիլը դուրս բերի իրավախախտում կատարած վայրից:

Քաղաքացի Բագրատ Մկրտչյանը Ճանապարհային ոստիկանության վարչական բոլորքների քննության բաժնում գրավոր բացատրությամբ հայտնել է, որ ՀՀ ՆԳՆ ոստիկանության պարեկային ծառայության Երևան քաղաքի գնդի ծառայողների կողմից 21.01.2023թ. ժամը՝ 18:31-ին Երևան քաղաքի Սարյան փողոցում իր նկատմամբ կազմվել է

վարչական իրավախախտման վերաբերյալ արձանագրություն և կայացվել թիվ 8300409118 որոշումը, որից հետո պարեկային ծառայության ծառայողը հորդորել է ավտոմոբիլը դուրս բերի իրավախախտում կատարած վայրից, սակայն նա չի կարողացել ավտոմոբիլը տեղաշարժել և մնացել է նույն վայրում:

<<Տեսանկարահանող կամ լուսանկարահանող սարքերով հայտնաբերված ճանապարհային երթևեկության կանոնների խախտումների վերաբերյալ գործերով իրականացվող վարչական վարույթի առանձնահատկությունների մասին>> օրենքի 1-ին հոդվածի 2-րդ մասի համաձայն՝ սույն օրենքի գործողությունը չի տարածվում, երբ ճանապարհային երթևեկության կանոնի խախտումը հայտնաբերվել է ոստիկանության ծառայողի կողմից, և տրանսպորտային միջոցը օրենքով սահմանված կարգով կանգնեցվել է՝ անկախ խախտումը տեխնիկական միջոցով ամրագրված լինելու հանգամանքից:

Այսպիսով ակնհայտ է, որ միևնույն արարքի համար դիմումատուին երկու անգամ է ենթարկվել վարչական պատասխանատվության:

Ելնելով վերոգրյալից և ղեկավարվելով Վարչական իրավախախտումների վերաբերյալ ՀՀ օրենսգրքի 247-րդ հոդվածի 1-ին մասի 8-րդ կետով և 293-րդ հոդվածի 1-ին մասի 3-րդ կետով՝

Ո Ր Ո Շ Ե Ց Ի

1. Ճանապարհային ոստիկանության վարչական տույժ նշանակելու մասին 09.02.2023թ. թիվ 2315921975 որոշումը բեկանել և վարչական իրավախախտման վերաբերյալ գործի վարույթը կարճել.
2. Սույն որոշումն ուժի մեջ է մտնում հանձնելու օրվան հաջորդող օրը և կարող է բողոքարկվել ՀՀ Վարչական դատարան՝ օրենքով սահմանված կարգով և ժամկետներում.
3. Սույն որոշման օրինակն ուղարկել Բագրատ Մկրտչյանին:



Լ. Սարգսյան